



焦太史編輯國朝獻徵錄卷之一百一目錄

廣西

布政使

胡智

伍希淵

龐泮

陳奎

魏一恭

許應元

參政

張勗

周源

胡堯元

參議

林興祖

朱驥

顧中立

吳鼎

沈寵

按察使

楊世華

副使

劉仁宅

廖紀

楊必進

查鐸

趙伊

鄭一信

錢立

僉事

鄭觀

熊景

邵清

袁泰

章熙

知府

蔡蒙

李昊

曹琚

鍾曉

衡岳

華愛

鄭舜臣

郭鼎忠

同知

葉禎

伊伯熊

通判

桑悅

知州

蔡運

州同知

張鐸

州判官

王濟

教授

李文利

驛丞

杜常

目錄畢

狀

卷之二 目錄

三

焦太史編輯國朝獻徵錄卷之一百一

廣西

布政使

廣西左布政使胡智

實錄

智字宗愚浙江會稽縣人永樂辛丑進士擢監察御史巡按陝西夏大雪智疑有冤獄未伸悉按部內諸司獄有繼母不安其室子諫之者繼母誣以不孝智廉得其情訊之遂釋其子宣德間陞廣西副使龍州與交趾思郎州連歲交兵爭地智定以公議交人不敵復爭景泰初陞廣西左布政使致仕十餘年足跡

未嘗入公門至是卒

廣西右布政使伍公希淵神道碑

李東陽

伍氏世居吉安之安福元季有性中者以鄉兵扞州里生子洪國初以春秋舉進士爲臨清縣丞是爲公高祖處士諱述經者爲公會祖知樂清縣贈監察御史諱寃者爲公祖封刑部員外郎諱體祥者公考也公諱希淵字孟賢少敏悟季父御史驥奇之言于刑部公俾與從弟希閔同受世業一日塾師請辭曰吾不能爲二子師也天順己卯公舉鄉貢癸未試禮部彭文憲公以春秋宗一時適主試事擢公爲第四人經義梓行者不竄一字甲申登二甲進士授刑部四

川司主事未踰年尚書以爲能令勘獄北畿歸輒稱
旨有大臣薦爲按察僉事例以資格弗許遷員外郎
進陝西司郎中決南畿重辟及錄浙江繫囚多所開
釋復薦爲大理寺丞不果有中貴臣銜命讞獄尚書
以下禁莫敢抗公執論侃侃麾之不肯退坐是賈怒
尋以誑誤出爲廣州府同知會後山有劇寇承檄與
按察使陶魯分路進捕多所擒獲勾稽軍籍陳便宜
二十事御史爲下列郡行之民相與語曰非伍貳守
幾不可爲郡矣傳聞京師擢知府公益自展布事無
劇易務力爲之嘗相水作陂堰多積穀爲儲蓄置保

伍使民自相扞衛徵科差役必審定丁戶凡所規畫
有至今存者獄訟尤所習辭察面折庭無留案興學
表善取鄉先達遺文刻于郡齋時集諸生稱說經史
以風厲之登上第爲顯官者踵相屬每部使舉郡縣
能吏必爲稱首一月間吏部連擬雲南按察副使及
湖浙叅政皆不果弘治己酉九載考績王端毅公爲
吏部方欲進用而巡撫都御史請還公舊治乃擢廣
東右叅政諸路習聞公名皆安其教令不敢犯乙卯
遷廣西右布政使取道歸省遂丁刑部公憂繼母劉
宜人亦喪家居數年公亦謝事不復仕而子符已進

川司主事未踰年尚書以爲能令勘獄北畿歸輒稱
旨有大臣薦爲按察僉事例以資格弗許遷員外郎
進陝西司郎中決南畿重辟及錄浙江繫囚多所開
釋復薦爲大理寺丞不果有中貴臣銜命讞獄尚書
以下禁莫敢抗公執論侃侃麾之不肯退坐是賈怒
尋以註誤出爲廣州府同知會後山有劇寇承檄與
按察使陶魯分路進捕多所擒獲勾稽軍籍陳便宜
二十事御史爲下列郡行之民相與語曰非伍貳守
幾不可爲郡矣傳聞京師擢知府公益自展布事無
劇易務力爲之嘗相水作陂堰多積穀爲儲蓄置保

伍使民自相扞衛徵科差役必審定丁戶凡所規畫
有至今存者獄訟尤所習辭察面折庭無留案興學
表善取鄉先達遺文刻于郡齋時集諸生稱說經史
以風厲之登上第爲顯官者踵相屬每部使舉郡縣
能吏必爲稱首一月間吏部連擬雲南按察副使及
湖浙叅政皆不果弘治己酉九載考績王端毅公爲
吏部方欲進用而巡撫都御史請還公舊治乃擢廣
東右叅政諸路習聞公名皆安其教令不敢犯乙卯
遷廣西右布政使取道歸省遂丁刑部公憂繼母劉
宜人亦喪家居數年公亦謝事不復仕而子符已進

雲南右布政使爲用事者所中就理浙藩旣而用事者敗始得白歸比有後命公已屬疾踰旬而卒公寬厚豁達不設崖谷而中有介辨解紛治錯皆談笑爲之雖專城牧長若不盡其用者事繼母甚孝謹撫二弟遺子女皆底成立官所入俸稟爲奉養賓祭費餘輒以分子姪暨諸媼族賻喪給婚不可勝紀生正統丁巳九月卒正德辛未四月年七十五

明中奉大夫廣西右布政使拙菴伍公希淵墓表
莆田林俊

正德辛未卒廣藩右轄拙菴公也子符亦右轄湖南留侍未赴得自盡于公碑銘二筆得吾師少師西涯翁吾友少宰圭峰翁二翁名宗工良副矣左轄吾閩又屬俊表其墓嗚呼其無已是心乎公諱希淵字孟賢伍出安成顯姓安成擅春秋伍尤正傳公在諸生與羣從僉憲君希閔號雙壁天順癸未公會試禮部名第四程式之文無涉艾潤名一日震京師傳置之天下爲奇歷刑部屬予辱尾公後繙閱舊牘法比精練公獨先輩人英抱直槩同官能道者部之大獄兩畿之大獄浙之慮囚皆擇能授公公當輒平爲司寇諸老鑒賞薦臺憲薦廷尉丞坐與審錄貴臣爭是非

陽雖公屈而竟行其中同知廣州清戎多襲具文公
搜摘弊隱二十事中其肯綮御史行其式爲式郡事
屬公寬伸滯流費省而誼以寂有無公不成府之謠
分捕山後劇賊謀預機先與陶察使魯功爲埒部知
廣之宜公也擢爲其府知府臨人出政預有以塞其
利孔清其弊源布行其寬大以基教化宜其下以孚
乎其上之人官能連旌憲使藩叅連薦廣士民在京
師者羣然譁所欲留部知廣之果宜公也擢爲其藩
叅政令行于百越嶺海之間人人指爲鉅人長德左
官放臣恃若地主若疾得醫風雨得大厦以庇姻族

鄉聚之施亦然立弟之孤祿之入至委而盡獨不事
媿嬰規規然校禮柄人觸忌諱旣遷廣西右布政使
念父員外翁春秋高紆道省牀下因得以視藥視斂
視葬以自盡于翁及其劉氏繼母喪旣除遂無四方
之志而符亦進士累如公官鄉以爲難公亦爲之私
慰嗚呼外藩之重至方伯而極矣昔柳公綽與子仲
郢並節度使公同也公綽善事繼母又同柳取進士
四人伍八人公及符及正郎全祖孫三世柳其或少
也仲郢及珙之到將無同乎伍自御史翁寬員外翁
體祥德厚開先公世引之柳根葉之論殆然至謂孝

友敬忠食之醢醬伍無一日無墓田雲物固有席津
潤而被龍光者矣表以并俟之

廣西左布政使龐公泮墓志銘

夏鏞

公諱泮字原化別號芹齋由縣學生中成化丁酉鄉
試登甲辰二甲進士第簡授工科給事中稍遷刑科
都給事中公在諫司久而又事無不言扶理善類五
沮格幸進一斥賤異教妄術三災傷二節罷好玩二
戚里一出身與中官爲敵怨二凡十有六疏可考悉
有頭尾每一疏入衆邀邀危公雖長貳皆以爲可不
必言者公自不能止若責獨在我又如論駁反活及
一事聯名爲副從尙多未計所幸遭遇 先帝仁明
間多報可卽有未合亦不過詔獄一旨戊午陞福建

右叅政近年大理之貳以待科道之交次者公兩擬大理丞于南京皆無成福建亦再上乃得公在閩分守漳泉興福先是福安縣庫被掠縣官利在得盜雜捕平民二十人趣斃之公至及活者三人權其罪盡絀知縣丞簿旣而以才力總督糧事辛酉當入覲李布政適病歿公次當行檢李篋中得銀千四百兩辭不取曰朝覲人事書一部足矣宋儒黃勉齋故宅爲中貴香火院公毀之改彌陀堂爲彌高以祀勉齋壬戌補河南右布政使首革鎮守太監劉瑯及馬尙書家私役錢銀以兩計日省三四十駕帖取洛陽牡丹

疏請罷之司禮太監李榮索古銅鏡器物公曰物非土產官取之民民無以應則累及冢墓卒不與甲子轉左廣西未幾思恩土官有爲叛謀調發旁午具有成績乙丑用病歸御史何道亨給事中戴寶之等交章留公不顧也旣歸詩酒親舊十有二年而卒得年六十有七其先襄陽德公之裔至隋有諱王者仕唐爲總管十三世曰正巳宋大中祥符間爲天台尉遂家焉高祖伯靜號石湖居士曾祖叔圭有士行洪武中辟不起祖諱瑞父諱計贈工科給事中公平居坦易遇事振發斬絕不爲左右顧視分所當行貪若嗜

欲挈利害而趨之不可扼挽予年十七八纔少知趨
向口不爲常兒語嘗爲公舉前人之言曰秦檜秉政
三十年只成就得一箇胡邦衡公曰吾輩耳中不可
無此等論議夫言必先有之不然安望其相入如此
也乃今日益驗公卒之明年櫟卜以某月某日合葬
公于縣西芝山之原手錄公歷官行實請銘墓中予
不得辭公嘗評吾文曰如我所見子之文比於韓柳
氏更若理到雖推許過實要爲不薄吾文也况櫟又
以爲言銘固吾責也公在官手不離卷帙發爲詩文
視其爲人有諫垣徽垣歸田三稿寵嘉錄名臣論略

若干卷藏于家或曰前所舉十六疏者若又出姓名
指列某事以爲後信可乎予曰得暢御史亨與浙江
鎮守張太監訐奏一山東副使楊茂元言觸時忌幾
死二刑部郎中丁哲斷事橫下詔獄三武岡知州劉
遜見構藩府四中官何文鼎言家法忤旨五威寧伯
王越營求再入六戒璇乘輜七濫度八燒丹禁中九
京師大水十陝西旱乾十一內監請備元宵燈料十
二傳奉取銅鼓十三侯伯周或張鶴齡縱奴殺人十
四論置蔣琮於法十五數李廣十死十六當暢張構
訐時適有知名已歿大臣視事兩浙反若有助張者

并出之非止以見公之難亦使居位者知謹於未死
之前於乎有如公者誠不敢不表而益著之銘曰志
則難於舉世嘻嘻蹇蹇匪躬臣實以乏若銅臣心山
石可移虎豹食牛視其兒時所乏矯矯亦有自持公
一不少氣隘殿墀惴惴小夫便汗弗支石不能言我
爲之詞百世而下銘公者誰

廣西左布政使陳公奎墓表

嚴嵩

中奉大夫廣西布政使陳公以嘉靖乙酉四月十五
日卒於南昌之里第公諱奎字文表始爲諸生學成
久弗試部使以年例黜之或曰名士可失乎復之遂
領省薦登弘治己未進士除廣濟知縣爲縣有名召
爲監察御史時逆瑾用事公往覈甘肅邊儲忤瑾意
撫公徵過逮赴詔獄久之得白擢山西按察副使河
南按察使山東右布政使廣西左使凡仕二十餘年
其行事可紀者衆矣在廣濟廉正率僚闡戒私謁俗
號囂訟常伺吏得失爲傾陷計公治其桀黠者數人

羣黨爲戢刊諭俗之文教民行冠婚諸禮改作廟學
買民地以廣黌舍程藝相勸學者由是日起歲大侵
貽書富民咸願出宿峙助賑全活甚衆罪贖所入至
瓜代粟積不下數萬邑人銘其政于石在御史論事
無所避出按廣西風采整峻臨試事稱得士在山西
築城南關工費甚鉅公規畫有方城成汾河大決將
逼城民惶擾不知所爲時方歲凶公廩粟二千七百
有奇募貧氓計口日給令濟河導流由故道城得不
滅而餓者亦賴以賑屢殄劇寇而不任其功公前後
所歷皆憲職慎於刑獄精斷明恕竄正吏牘運筆如

流吏抱案立不得出一語屢讞大辟可疑者率破械
釋之而姦賊之吏則按劾無少貸蓋公施於政者如
此然以性直不能隨世俯仰爲貴要所忌獲不根之
謗言者論公前在河南嘗爲逆藩市馬朝廷下所司
考驗無幾微實跡雖事枉得白而公已倦且休矣屬
疾方劇冠適奉使南方間道歸侍公無他語但救以
守官報國葬制從儉而已陳氏之先爲江州人後徙
吉水五世祖天錫徙南昌天錫生子隆子隆生銘銘
生聰浙江餘姚縣簿公之考也贈監察御史聞諸君
子之論曰大夫飾已厲行期自樹遇事敢往有爲乃

一遭污讒卒黯抑終其身惜哉嗟夫愛憎異情譽毀易論今之士其不幸而蒙此者亦多矣豈獨公哉

廣西左布政使魏公一恭傳

李德用附

柯維騏

魏一恭字道宗號立峯莆田縣人嘉靖己丑進士授
溫州府推官郡中張璉當路一子弟恃勢慢忽官府
一恭擒而笞之境内肅然民為立生祠轉撫州府同
知擢刑部員外郎論事忤堂官謫潮州府通判轉楊
州府同知擢廣西提學僉事浙江按察副使嘉靖丁
未一恭坐鎮四明郡而開府朱統以行部至時有倡
議於定海邑海島中築城且列置戍樓朱徑可其語
一恭奏記開府曰是役也非費巨萬更再歲不能卒

業且旦夕波濤撼激不出數年卽舉而棄之無益也
絕不可行朱迺檄守巡二大夫偕一恭同歷海壖睹
形勢旣至朱指畫上下躍然抵掌以爲倡議者言便
二大夫復從旁是之朱迺以面嚮一恭視一恭復持
初議否且欲面難言不便者何狀公轉盼故作望洋
不顧朱爲一恭好乖其意不懌甚已而朱復以大捷
盛帳具宴一恭語諸佐吏曰海上幸獲無事吾曹莫
能效尺寸功奈何以捷聞也而強從宴宴之日定海
令具金花文綺自開府下至材官各有差一恭獨掉
頭麾卻朱目攝之一恭不以爲意朱倨坐席上爲之

不怡者久之酒數行卽罷宴後迺以他事劾論一恭
疏已驛發矣御史裴紳方言魏有盛名劾且不利迺
遣疾騎從間道追還已進江西叅政廣東按察使山
東右布政使廣西左布政使俱有勞績其未擢左使
也山東廣西士夫羣赴吏部爭乞一恭再任未幾卒
于任年六十五一恭起自單族刻意清約累宦行李
蕭然無長物過里敝服徒步如寒士平生一毫不苟
取雖交際微物亦固却寮案多訾其形人之短一恭
聞之不爲變也一恭之後有李德用字于父號弦所
棣江人嘉靖庚子鄉薦授廣東長樂知縣性介而宦

亭

貧不能養交六年弗遷藩司亦弗與考績德用因病
圖歸省懇乞致仕不俟報徑歸殷分巡知德用清苦
檄縣贖金百兩為贖堅辭不受卒于途父老築却金
亭以旌其節又立祠縣左子多見萬曆甲戌進士

廣西右布政使許公應元墓志銘 庚一元

嘉靖乙丑茗山許公卒公諱應元字子春生而絕敏
數歲日誦數百言為諸老先生所賞異年十五為博
士弟子二十而舉嘉靖乙酉鄉試己丑赴試春官太
史倫公以訓奇其文欲寘高列爭之主試不能得恚
曰第落之異日以冠多士耳壬辰舉進士倫公復品
之曰西京之文也當選庶吉士執政者知公欲一見
公不往曰吾始仕也而當偃僂鼎貴之門冒謁于進
哉坐是竟不得入翰林出知泰安州然應制諸詩籍
籍傳矣吏部李公開先見之亟嗟服為盛唐雅調焉

州故敝士久不舉公至則闢泰山書院簡才士濯磨
教之士遂連舉文風大振有豪右觸死法賂權貴人
以請公不爲撓竟斃之廉白自持苞苴斷絕減節民
力不以媚上嘗有史僉事者怒其簡薄粹寮吏欲笞
之公從容進曰饋之不豐知州罪也請貸寮吏僉事
不顧公出卽投劾自免於是撫按父慰留公而僉事
亦內愧去無何以能理劇復調秦州治如泰安秦人
有張御史者陰鷲常徂伺持吏短長橫州中公至張
伺無所得卽偪伏不敢訛法居一年所丁父平厓公
之憂以歸服竟擢工部都水員外郎是時江西夏相

國者幸於

上詔工部遣匠作治其父墓而夏欲得

名士卽陰推部疏以公往非其志也然職事不得辭
使往且二年益持廉正非公事不交相君相君心敬
之事竣欲轉公太僕少卿公聞堅辭又欲使爲江西
提學又辭其轉爲虞衡郎也董鑄錢治盜甲日與中
貴人從事而公端凝自持未嘗與私語中貴人亦莫
不敬公者逮歲甲辰則公爲郎六載矣乃遷夔州府
知府夔者楚蜀孔道交夷漢集兵民民罷事蝟號難
治公馴以廉靖馭以平典時斥其桀黠者法之郡以
蘇息日勸學敦士暇則求三閭大夫杜工部遺蹟爲

祠祀之吊古嘯咏篇什流傳以儒飾吏彬如也而夔之治遂爲一道最已酉擢四川按察副使甫上而值執政者新用事求故相所厚簡之而公素不交執政則以爲故相所厚也又有前使事卽嗾言者彈公御史大夫屠公僑者剛正人也爲抗言于朝曰夫許子爲郎久之乃出爲遠郡又久之乃遷若此者而猶謂之干進耶於是素履愈白然猶調爲廣西副使兼撫夷夷侵蝕郡縣久公患之爲上三議曰責陞主嚴罰格更旗軍大略主守隘護田者扼夷奪之食獺牙犄童使白屈而已事皆施用已又攝兵府江誅巨獍三

馬巨獍者莫氏兄弟凡三人以雄勇名兩粵間往數歲嘗大嘯聚破城殺吏討之漏刀去前兵備以獲報而罷兵及是則復出猖甚公懲前事計必得因設方略陰部勒購土人浹旬而三兇授首江道底寧督府將上其功公念事聞前兵備且得罪迺力沮不復上聞者蓋莫不多公間治獄有觸法當遠戍者而人甚衆公第謫其一二人餘悉未減御史則欲盡謫之公曰法如是足矣且戍者皆當發閭左護其行本以懲姦也而甚病民不可凡公之措意弘厚類是也乙卯遷遼東苑馬寺卿又孳孳條牧政八事明年轉爲雲

南布政司叅政未上而奔太宜人喪已未起補福
忠時倭夷整居縱掠諸將守便宜趨起不戰且久公
至則慷慨蓐食厲兵以寡擊衆遂大破賊多首虜功
烈公終守正不以私於當事者事上亦竟不錄也然
公去閩半歲間則後守者隳敗賊遂入輿化塗地矣
正戌爲雲南按察使明年徙今官所在有績廣西父
老迎公蓋欣欣喜而泣也然公再歷漳鄉憂民惕夷
貌亦佻尋爲之蔽矣歲甲子卒得年僅六十悲夫所
著曰水部稿曰倚堂稿所撰次曰春秋內傳列國語
曰史記抄曰漢語今若干卷

叅

西布政司右叅政張勗傳

實錄

張勗字勉夫吳縣人父以常求樂甲辰進士爲河南
遂平知縣改永平灤州學正勗侍學於灤永樂丁酉
中順天府州試授揚州江都縣學訓導秩滿用薦試
上國觀光賦等題陞監察御史勗以身許國知無不
言嘗出按山西體察民隱密封奏之其言激切有古
諫臣之風而不便者媒以他事必欲陷勗以死賴
憲廟仁聖卒保宥之陞廣西布政司右叅政丁母憂
歸未幾卒年止四十有九勗氣宇剛方閨門之間亦

以之爲矜式

廣西左叅政周公源墓志銘

吳

公諱源字本清別號直齋周氏爲武昌著姓其先有
諱壽者仕元爲翰林直學士曾祖諱仲彰隱居不仕
祖諱縉永清典史 文皇帝靖難兵起永清公佩印
南奔將他圖事泄械送京師 上美其死謫戍
興州父諱瓛以公貴封監察御史沒贈知府母邵氏
繼母張氏俱贈恭人公少莊重喜讀書弱冠遊邑庠
益親師友勤學問遂有聲場屋中景泰元年湖廣鄉
試卒業太學拜山東道監察御史恒以別白邪正爲
心每言小人過雖小宜遏其微君子不幸而有詿誤

不可以不拯拯議者謂識大體未幾奉勅清理河南軍政時姦弊多吏不能革有養乞兒補籍伍指同名以覲免役者公悉爲正之成化丙戌巡按貴州舉廉黜貪有大吏爲劾去卒無怨言金竹安撫司安撫金澄爲叔鐸所鳩其繼母王氏發之鐸遂誣王與澄亂且云有娠王不勝拷掠竟誣服禁踰年無驗公至爲直其冤乃寘鐸于法丁亥丁外艱服闋 上命公賑濟大興等縣所活民以萬計招撫流亾三千餘家適揚州守缺吏部以揚南北要衝苦役繁且值歲饑民不能堪遂奏公補之公規畫有方供費不缺而民不知勞時有鹽商曹隆買妾楊氏楊攜韓氏兒祥依隆居祥長誘隆子玘至野外殺之因誣其仇張俊潛入城濠洗血匿刀水中邏者縛以見公祥以刀未獲不卽承公臨濠上忽有飛鷹墮水中公曰刀在是矣今人沒水取之祥遂引服興化有婦人張氏殺其夫朱普普家不知其鄰周坦知之婦遂訟坦殺夫繫獄數年不決公得其狀出坦公在揚所斷疑獄如此類者甚衆不能一一記也丁酉以內艱去位服闋改臨江府臨江民好訟株連蔓引動千百人比揚尤號難治公聽決如流獄無滯囚甲辰陞廣西左叅政分守柳

州柳之都指揮王英暴且貪士卒不勝擾譁而出城
幾欲爲變公聞之急馳至諭以禍福遣歸營且劾英
罪卒乃聽命丙午公年滿七十謝政歸鄉里日與故
舊飲酒哦詩爲樂有語州郡短長者輒不應弘治癸
亥卒于家春秋八十有七公平居謹厚退然若不能
言及居官臨事則精明果斷吏不能欺勢不能屈而
其要卒歸于仁厚與人交一以至誠未嘗爲遊詞爲
色雖奴隸之賤與其惟恐傷之故見之者皆怡然
無不滿之色卒之
滄馬嗚呼公可謂
鉅人長者矣

贈右布政使廣西叅政胡公堯元傳

胡直

胡堯元蒲圻人兒時游白石山謁顏真卿祠嘆曰大
丈夫歿國血食斯土榮名豈有旣乎慨然自許登正
德辛未進士授戶部山西司主事督金盞馬房諸倉
闔人谷大用者瑾黨也嘗以門客屬公公沮辱之司
徒王瓊以谷言責公公曰官至尙書倚若爲氷山耶
瓊大恚亟謀去之冢宰楊一清雅知公以司徒言薄
譴高郵州同知州運河故邢溝也水自諸湖入河承
下流兼三十六湖之委歲春秋湖水溢害諸田夏冬
水涸不可田民苦之乃請倣古人溝洫之法方一里

爲溝深一丈六尺廣二丈至興化而止河東故有涵
洞石匣如法修之以時啓閉旱潦不能災民甚賴焉
州民好淫祀士女祀之東嶽無忌公毀之更爲文游
臺祀蘇東坡黃山谷孫莘老秦淮海四賢羣諸生其
中攝江都邑亭丁丑 上詔侯指揮妻馬氏入宮言
官諫不聽乃之疏略曰漢選後官家人子入侍唐納
壽王妃職爲亂階 上不納闈人史秦督制御服還
京所過郡邑賊殺亾甚衆公抗疏條其姦乞詔法
司訊鞠梟史秦首 謝百姓復斬臣首以謝史秦
時人人爲公危 上寬仁無言 莫不賢之戊寅冬

選江西瑞州府通判明年六月宸濠反中丞孫燧副
使許逵死之公自吳城聞變微服徒步夜行旦伏間
道五百里還郡被執寮屬亾去公攝郡事召士民泣
諭之歿守無貳遂請兵中丞王守仁卽日具疏 上
召使人榻前勞問賜食詔擢公爲守僞駙馬李蕃掠
城中乃集兵謂妻黃氏曰吾與城俱亾汝善爲計黃
氏泣曰君其盡忠毋以妾爲念公出黃氏懷印抱女
顧季子宣及家人胡永曰事若不測妾當投井以死
公乃簡壯士盛官儀詐稱迎藩伏兵石鼓潭擒之斬
首九十四級報至王守仁曰微胡通判瑞其不免乎

守仁遂屬以兵使備賊無西公曰濠無西意第恐東下爲憂耳乃使人聲言瑞兵十萬且至夜城西隅忽墜城中鼓噪謂瑞兵至矣濠懼修戰守之具甚備七月朔帥兵趨南京守仁屬公勵壯士前戰于王家渡偽都督凌十一馳馬向公佯却竟發一矢射死之擒賊周瑞追戰于八字腦擒殺二百七人師次鄱陽湖南風急公曰賊衆難卒平乘風縱火可得志也或謂風無常難恃公曰討逆自天何疑哉乃與吉安守伍文定部分將士縱火焚賊舟遂俘濠賊平始還郡黃氏曰吾與君得生蓋天佑社稷耳元以郡承師旅之後務在拊循爲條教下諸州邑訪故老咨民利病清獄市輕徭薄賦郊行勸課農桑賑貧恤死施藥療疾嘗郡中徭費三千餘金嘉靖壬午詔以江西功授廣西右叅政督總糧儲巡察邊務洛容邑爲賊陷幾廢公復之建桂林書院買田百畝給筆札膏燭選學官明經者爲師諸生各以其經受業馬土酋岑猛守田州以兵力自凌轢他郡劉召者猛逆黨也誘執都指揮孫震曰必復土目退官兵乃還震耳或謂震輕嘗賊請釋召公曰震固易敵田州土酋得無陰使召耶土目復官兵退召必擁震而入思恩計之晚矣乃條

酉罪狀白當道督責諸帥難之不從以和召果以震
去如其言中丞盛應期屬公曰諸帥違若言敗若深
知兵其盡力公辭不獲乙酉三月進兵擒賊將李隆
禮陸利廣脫其縛結以恩信使執召轅門贖罪當道
欲致二人于法公曰業已許之其可背乎自是餘賊
多附蓋自召叛至今十有九年矣公乃深入東蘭邠
地金城諸絕域經畫疆理宣布朝廷威德奏凱還是
年冬中丞姚鏌疏請征猛 天子可之鏌問計將安
出公曰岑施王達爲猛敗失其職守怨猛深今若許
其立功還故職則二人樂用又使人聲言兵十萬取

田州猛必專意泗城乃思使恩堅壁捷良三心以游
兵劫其村落令猛左顧以禦思恩南寧武緣各整兵
旅待湖兵至夾攻之三面受敵猛亾能爲也若餘兵
四掠以右江兵出賓州左江兵與南寧武緣合思恩
兵從後擊之賊將奔突無地歸順者猛之南屏也猛
親在焉猛急必遁歸順趨交趾若陰使人結其所親
以啗吮之功乃萬全策耳鏌奇之遂屬公鎮南京湖
兵至檄公監軍都督指揮沈希儀等五將軍帥八萬
分道進令曰擒猛者聽轅門計功行賞賜千金爵一
級畀其地黨惡者移兵誅之猛懼謀不知所出裂帛

書寃狀抵模模不聽六月一日公帥兵進攻賊將陸
綬號萬人敵猛男邦彥素驍勇公曰此難短兵接也
選精騎馳射之綬五易其馬公追之殺七十四騎而
後授首邦彥逃猛果謀出奔猛婦翁歸順知州岑璋
以其女失愛於猛憾之欲得猛以爲功先是公令沈
希儀等察千戶趙臣雅善璋遣臣抵璋所得與猛相
讐狀說璋擒猛自效邦彥守要害璋佯以姻故遣千
人助之實爲間邦彥納之及兵擊邦彥璋千人爲內
應竟斬邦彥猛奔璋招之曰事急矣願主君走歸順
三四夕可至交趾猛從之公策猛已至璋所遂以兵
萬人擣歸順璋遣人持羊酒犒師見公謝曰猛欲走
安南璋繫之亾去幸緩五日當縛至轅門乃許之璋
乃給猛曰天兵已退當爲君奏白寃狀遂爲疏令猛
出印印之璋知猛印所在置酒賀猛持醪酒一杯進
曰天兵索君急不能庇請自爲計猛遂飲酒以死璋
斬其首并佩印遣使至軍門上至所分兵復斬賊將
王林等初公聞邦彥授首恐非真進隴容巢窮驗之
冒瘴死復蘇猶口授諸將兵事一十三條疾遂篤輿
至橫州卒時嘉靖五年九月二十九日知州陳堯恩
視其行李唯夏衣數襲圖書盈篋發公內帑殮馬士

民哀之如喪考妣請立祠大中丞石金疏其死國事
乞贈官立祠以祭詔曰胡堯元實死國事贈中奉大
夫右布政使祠桂林

參議

廣西布政使司右參議林君興祖墓表

楊士奇

廣西布政使司參議林公永樂九年九月七日卒春
秋五十有一林之先居光州固始唐末諱靖者從王
審知于閩以功封忠列侯終于閩子孫遂家福清至
元諱廷玉隱居不仕生考亭書院山長時中山長生
福建行省員外郎子華公父也員外元季鎮潮州又
家於潮公諱興祖字伯禎幼穎敏嗜學七歲而孤母
陳守節教育之稍長出從明師十四能屬文十五從

師授春秋經日習舉子業家貧教授以養母而能盡孝母嘗坐舅氏累及至縣庭將笞之公叩頭哭哀請代笞縣併釋其母子翌日縣以禮幣舉孝廉上京師授山東蓬萊縣主簿持恭慎凜然冰檠之操三年坐稽公務降龍江驛丞丁母憂去服闋改儀真遞運大使陞邵武府倉大使郡中歲饑尚書夏公時巡撫福建得便宜行事郡集其屬謂曰民孳可憫孰能詣巡撫求賑者方隆暑炎赫衆莫應公曰興祖當行卽懷郡牒晝夜倍程以進夏公覽牒從容未有言公懇懇言民命危急仰公如慈母義形於色夏公遽檄郡發

廩所活數萬口郡守丁原振薦公于朝陞當塗知縣有愷悌之政典學育才表善勵俗而廉操如蓬萊吏民戴之滿一載陞代府長史賜勅諭及襲衣文綺當塗耆老數十人伏闕下乞留不得皆涕泣去公爲長史夙夜思所以匡輔之道疏陳十餘事又隨事直諫不見聽朝廷知之召還改工部都水司郎中居無幾陞廣西右叅議時安南逆命朝廷方出師討叛命馳驛之任旣至卽躬詣邊境周視嶮易繪圖以進且獻所規畫又請兵之所加止罪叛逆預禁將士俘獲生日用慰來蘇之望踰年安南平郡縣其地調交陞綏

輯降附振起凋殘夙夜盡心焉一日餘寇復叛公守盤灘城所招降三十餘人皆在城中寇圍城急主帥慮三十人生變將盡殺之公曰吾既許以不死殺之不信將何以得後來者且三十人何能為卒不殺而寇解圍去公在交趾再歲朝京師至藤縣卒其為人端重有雅度終日端坐人未嘗見其疾言遽色事寡姊如母訓育孤甥如子卒致有立其友張禮聞為學正死濱州子政孤弱不能歸公至廣西君與其子同學業成厚贖遣歸後政亦致通顯公居官有實惠及人性澹泊不殖貨利家無餘資惟積書數千卷嘗指示其子曰吾以是遺爾足矣好為古文所賦詩有棠陰集藏于家

廣西左叅議朱公驥墓志銘

韓雍

公諱驥字漢房姓朱先世為琴川文學里人祖以上隱德弗仕父士進樂善好施鄉稱長者母蔣有淑行公自幼警穎絕人八九歲能涉獵經史十三為詩屬文有老成句弱冠父命為邑庠生孜孜力學不懈寒暑正統戊午領京闈鄉薦隨值外艱家居哀毀骨立後三年壬戌始克登劉儼榜進士公風儀秀雅文思煥發題詠述作迴出人右而揮毫染翰適勁美麗自成一家朝士甚器重之未幾上命典遼府喪事克稱任使王深嘉之癸亥擢大行人奉使所至宣上

德達下情不愧任使而與人辨論古今人物得失事成敗利鈍傾座歛聽議者謂其誠有專對之才既而敘賢勞進監察御史正色立朝侃侃論事不爲權貴所屈嘗出按淮南諸處風稜峻整民吏震懾剖決訟獄筆無停思所至人皆以才御史稱之閱三載受勅贈其考文林郎浙江道監察御史母妻俱封孺人時廣西盜寇竊發民不堪命藩臬諸司官皆簡才望卓卓者往任當道遂薦公爲廣西按察司僉事公至籌畫可以弭盜事宜若干條獻策於主帥安遠侯柳公安遠雅信重惟其言是聽以行多所克捷盜旣平安遠以公多奇功聞於朝陞公廣西布政司左叅議進階朝列大夫已而盜復起公從安遠出伐籌畫益多渠魁就擒餘黨悉平朝廷知其由遣中使齎璽書金帛卽軍前諭勞甚至公之平生所樹立章章若此凡其僚屬與朝之縉紳士大夫率以卿輔期之而公以公事入京便道過鄉遽疾遂不起嗚呼傷哉公生於永樂丁酉九月卒天順壬午正月年四十有六

左山先生顧公中立傳

徐獻忠

左山先生顧公名中立字伯從華亭顧氏出自梁橫門侍郎野王郡中名家稱顧氏幾與陸伯言後世等國初居柘林以詩著者名景暘生彥迪永樂間以儒士徵君英國幕府於先生爲高祖彥迪生仁仁生鎔任阜口尉瑛生斌中鄉舉任興寧令以循良稱娶康氏生三子先生其仲也垂髫時補邑弟子領正德丙子鄉薦與其弟中孚同丙戌舉進士授南刑部主事後轉北部以望選舉本科看詳諸司章奏者三年後以便養太宜人復乞南改授禮部儀制司郎中逾年

補山東按察司僉事滿考陞廣西布政司左叅議母老乞終養歸先生自幼穎達書過目卽通大義顧文僖公清聞其奇俊以心正則筆正題試之頃刻屬草運於身者皆氣也而所以生則存乎心文僖大異之遂收置門下爲高弟子其在刑曹叅駁詳愼多所平反聲稱偉然在山東力持綱紀屬吏不法者往往解印綬去監司有疑議多取決焉有邑令犯贓先期取赴部請移文銓曹械歸罪之其志務在愛養小民非立名也青徐間歲侵流離載道亟欲賑之有司以未得請爲慮先生曰人死不能須臾有咎當自承之以

是全活者甚衆其設法捕蝗尤爲省便以威望推督銀鑛姦宄帖息究其用世之才什未一二而政績已卓然矣任刑部員外郎時獲以恩例贈封父母後得日侍太宜人雖仕路方達欣然棄官歸人咸重之長兄中行早世撫視其孤竟有成立與弟少相敦愛至老不替先生旣乞歸弟亦棄官相從林壑間一景可適一味可甘未嘗不共也其孝友之性出自天成如是宅之西偏有地數畝闢爲園池花竹蔚然可賞因以洪厓名其堂花辰雪夕與三四良朋舉酒賦詩不復料理人間事諸所酬應悉出自內因得暢然適其

情晚更杜門養靜獨處一室扁曰鐵漢窩探討名籍
雠校甚多聞一奇書必構構而得之必了其義勸則
偃息適則高唵其所自得已多矣有道人薛頭陀者
聞其風謂可與入道也造先生居終日少語長夜無
寐授以長生訣先生雖善待之謂人之正氣自可
長留於天地間何待解脫稱仙人薛笑而去先生賦
性本自剛明直諒而靜虛公家法復方嚴且里中先
輩若夏之夫之敦素張莊簡之清正顧文僖之真純
日常誦法不置故其居身有尺度仕宦無詆訾吾黨
良士如先生更幾人哉所著詩文若干卷名洪厓堂
集四子務學向往咸有端緒雖未入仕固已有後矣
予與先生締交久一旦萎謝悵望靡及固輯其行略
爲傳云 徐子曰詩不云乎雖無老成尙有典刑顧
子雖言往追思其槩行歷歷可程法後生自砥以立
名節將不有途轍耶孔子思見君子曰斯可矣茲雖
傷感衰周未俗要之上世聖人固不多生而師資之
道未嘗闕也嗟乎如先生不謂君子者乎

廣西布政司左叅議吳先生鼎墓志銘

許相卿

吳君諱鼎字維新錢塘城北隅人也父宗裕赴承德
郎刑部主事母陸氏繼母戚氏妻顧氏贈封益安人
君少慧嗜學父母念獨子重苦之交禁弗爲盧選錢
塘文學弟子員朗秀駿倬氣蓋一時矜佩少年諸司
勸學較藝輒皆取君冠其曹君正德中進士釋褐試
吏尹臨淮臨淮帝鄉壯縣民多優復習游惰公私玩
敝謾偷政廢不舉糾紛十倍小邑宿吏側目少君君
穎識敏裁便宜張弛更以辦治稱監司使者僉上君

治行異等堪風紀選不報 毅皇帝南征侍衛中外
諸臣騎乘數十百萬所過縣次續食有柄事中貴人
道臨淮非分徵索供具無厭橫甚君從民吏往致常
饋不贏中貴人大失望憤詬呼挺君銳身先民吏當
之民吏爭前衛君擊傷中貴人中貴人奏逮君繫詔
獄一歲所者廷議白君還治用舉者徵爲南京刑部
主事改南京兵部以承德公喪罷歸除喪謁告不任
者十有五年用舉者補南京兵部員外郎轉南京禮
部郎中遷廣西布政司左叅議乞侍養亾何病卒年
五十三君方病甚二童奴擁之坐氣漸微而神不亂

忽左右視曰爾孰誰耶吾其歿於吾兒之手二十舉
扶代之若將寐者而絕君起寒約性鯁諒力學自立
危行不疑恥媵媵苟同孤立行一意而已俗或病其
不諧以哆憎口然居約奉繼母當其心裝嫁四女弟
甚周與人謀必爲之盡當官事關利病直往敢任不
顧計前却故所至舉職大節斷斷士亦以此多之一
時顯望魁人往往折輩行慕與之交然仕不充志壽
不盡年懷挾其所未究溘然長終已知君者莫不傷
懷垂涕云君生好文特甚其爲臨淮罷劇猶手一編
吾伊空堂中治當南北達途過客時有中原文獻家

博文邃古諸名士大夫君輒委已交驩與相下上其
論旣謝病屏居愈益專力萃精償其積志六籍而下
九流諸子策士春秋先秦盛漢之誤古金石竹簡之
傳旁逮外家雜說譎誕恠迂之語凡奇古文字罔不
雋飫醇酣江左北朝以還唐宋近代諸名家亦皆決
藩入奧神詣作者故其文深涵大放瞻蔚闔肆能盡
達其意所欲言淵乎蒼然有西京氣骨君率歲一訪
予紫雲山中坐語移日扼腕論文纏纏弗能休予曰
雅哉辯然非藝乎末耳吾衰弗事此也久矣君素多
病奈何敝精以徇末孰與斂英沃根毓神以貴而生
乎君惟然離席曰愛我哉陳義甚高僕將從子於忘
言矣然君文聲籍甚紹介屬筆者彌衆不容自解免
焉每一篇出學者爭傳諷之郡諸老先生辯博能言
者皆自以爲弗及也時有紀述莫適自任必推泉亭
先生云二子好學世其家

廣西布政司左叅議沈君寵墓表 萬士和

沈君諱寵字思畏號古林宣城人也君爲人外貌樂
易而性實剛方志存一體然不務阿世見一善事鼓
勇直前不爲不止聞一善人負笈千里不見不巳所
交皆當世名士故海內嚮道者莫不知有古林君其
鄉有貢受軒先生者受學於歐陽南野氏君師受軒
因同至南都叅南野有得於致知之說已而得見王
龍溪錢緒山二公悟證益明然君每崇實踐不落言
詮此君學問之終始也君年幾弱冠其考桑園公督
之業農君白其母固請就學旋入郡庠中下西鄉試

甲辰落第就選授行唐令以才調獲鹿出申擢監察御史清戎福建癸丑陞湖廣江防僉事丁巳陞廣西左叅議致仕隆慶辛未年卽世此君歷履之終始也視民如子視官事如家事賑饑荒復流徙教紡織節廚傳一切保甲倉儲團練之法無不舉行此君之治邑於行唐獲鹿者也獨持法紀風采凜然均編役黜貪墨興正學別賢否至於搜獲盜摧蕩九龍灣巢窟此君之才著於御史

司者也君當爲令時保全仁其爲御史監司鋤姦遏惡

惟思不盡治尚威嚴蓋牧民之體執法之職旣不相

同而北土瘠薄易於離散利用招徠江防巢穴易於哨聚利用蒐獮因時制宜同歸於治而已豈有心於其間哉君自歸田後講學一念老而彌篤時郡守羅君立開元之會諸生環座者數十百人耿楚侗督學臨校深爲嘆賞檄聘君與梅宛溪叅政主其席諸生因而善良者甚衆宣城風俗至今知學者君爲之倡也君性孝悌事父母及喪葬咸竭其力復喜施予自未遇時鬻衣器易粟以賑貧乏及致仕歸悉以俸餘爲伯仲買田宅創建祠堂聚族子弟教於其中此雖非君難事亦足以稱於宗族鄉黨矣疾革時人來問

廣雅錄 卷之一百一 三十五
疾者輒與論學亶亶不倦或問君曾次云何君答曰
已無物矣顧子孫囑以善自勉不及他語遂瞑

按察使

廣西按察司按察使楊公世華墓志銘

孫鑛

按察使楊公者諱世華字懋成別號完愚我大母忠烈夫人從孫也楊在姚中爲顯姓登仕籍者甚衆迺我外曾王父拙菴公獨隱居不仕然好書有遠識宗人重焉晚乃以貴爲郎我大父忠烈公壻楊氏實拙菴公才選者也孫氏自忠烈公始顯而大母夫人治家有法不異孟氏母子孫惟所自咸重外家以故孫氏楊氏視他外家兄弟誼尤篤如同姓云拙菴公諱

苓生雲坡公諱節工楷書嘗以鴻臚郎直兩制忤闈
劉瑾謫袁州幕鬱鬱不得志遷倅高郵歸晚年畫尤
精人得其手跡者咸寶之生古愚公諱大綱不仕以
孝友名有五丈夫子長世芳嘉靖丁未進士汀州知
府次世英庠生次卽按察公次世美世蕃皆庠生余
四歲時在京都識兄汀州公卽如從兄不異十三歲
寓郡城始識我完愚兄是歲嘉靖乙卯兄始登鄉舉
也明年上春官不第時汀州公在刑部因留京師益
篤志本業武進吳太史可行慕之延以訓其弟中行
壬戌兄登進士時余在家仲兄宗伯公謂余曰十四

兄因宜中前己未時在儀司見其落卷實佳兄蓋行
十四也是歲除南刑部主事治獄持平例未嘗傳致
人罪隸比者皆不怨晉員外郎郎中隆慶改元實授
先是我伯父以汀州公在刑部贈主事至是乃贈奉
政大夫南京刑部陝西司郎中云明年兄擢撫州知
府以仁恕爲政不苛擾窮谷頌德庚午冬上計京師
余燕飲間問兄曰聞茲郡巨室多當不無掣肘將奈
何兄曰彼地尚禮吾敬之如禮惜禮者多自愛設有
請惟據法上下吾敬禮終不失彼雖意不滿然禮在
也寧重銜我在坐或曰江右訟師善爲幻有訟者卽

以其黨僞爲見訟者惶恐伏罪比爰書定寃者尚不知兄不答言者去兄乃告余曰此所謂紙棺材者此必關財產事今訟勝則且匿其案俟十餘年後斷茲獄者皆去乃往攘其業度彼亦必訟然舊案在欲覆審詢之間井久之真情自出度無僞獄案乃定若夫爭鬪須見決者此自難以僞何慮此二者足知撫州政矣後二年遷廣東副使兩臺留之仍徒江西治如故弘大體不汲汲爭名然自檢則甚密法有不可卽直指前必力爭之萬曆乙亥轉山東叅政督吳中稅

推誠與人不甚見短長賢者悅服不肖者亦茫然莫知所窺以故彼地人情雖不齊然見兄則心醉人人皆謂叅知公親已其行政不廢催科第不以嚴刑促之貧乏者或暫與假貸時時見爲不得已民亦知兄响濡之相勉完賦每歲竟課賦額有倪左史之最焉踰二年擢廣西按察使兄敷歷久益精政術事皆迎刃解粵西又少事案牘甚清又兼有禦寇功錚錚向開府列卿矣會時政方尙苛察兄矯以惇大見謂不綜核有同年友在要路急欲相引兄于于應之要人不悅忽有詔竅臺省長吏凡長厚者多罷兄亦在罷

中以致仕歸兄生平鮮喜怒或有所忤不見於色待其人如故久之若忘性緩顧每以緩集事在南曹有公不平同官一人攘臂欲往爭之兄弟遙呼曰來其人返問故兄曰姑坐因纏繇作不了語相遷延莫決遂不果往既而事竟白又有大獄或先爲飛語云將投重賄又云以要人某書來衆曰事以灼灼宜急具獄無使隙生兄故徐之衆屢促兄曰某事未的已又曰待某證至既而情得與初所鞫殊賄囑亦竟不來前云云者乃敵家懼獄負用反詞相激也衆乃皆服足鄉亦大略然陳恭爲公嘗曰人人完愚悶悶然其於世情極透發必中的又常蚤覺有人所難者彼固易之勝彼察察矣宦無贏資僅僦舍以居田不多恒躬課耕耨盛暑僕僕田間既而食指漸繁饗餐幾不繼處之自若時與閭里相過從道宿昔爲樂不立畦徑間訂約爲會奕棋飲酒兄不善酒然喜治具不厭曩受業生吳君中行後爲翰林編修以直諫杖闕下既復起官論名震四海人視其言爲輕重甚推轂兄會渠與時忤言不入故兄竟不起吳君嘗告余曰人謂我師才短然我知之其實有餘世自重彼儼例者耳余自童時兄視之如弟時時提耳訓誨有疑事質

於兄兄必詳論始末直示所以調劑者余敬聽之迄
無悞余甲申丁母太夫人憂歸與兄相從七年近丁
酉解組歸又七年非兄它出無半月不面間追隨棋
酒間真不異手足而今已矣有過孰我箴余蓋痛之
甚焉兄敦於天倫長兄宦達無論矣仲兄蚤世買山
葬之壬戌兄試禮闈甫畢役榜尚未出夢仲兄哀語
相勞若云汝今已登甲第獨我長湮耳卽卒之日也
非天性篤至安能冥感如此兩弟在青衿尤厯顧恤
少弟卒亦爲理葬事仍鞠育其女爲之擇配族戚貧
者時周之不責報焉兄生嘉靖乙酉四月二十日卒
萬曆癸卯九月八日享年七十有九

副使

廣西按察司副使劉公仁宅行狀

李東陽

公劉姓諱仁宅字廣居其先山東東平州人宋南渡
有都統制諱寶者從岳武穆岳鄂間始居華容大父
諱必弘考諱行簡贈監察御史妣周氏封孺人公生
八歲日誦數千百言年十五能屬文補縣學生永樂
庚子舉湖廣鄉薦卒業國子正統丙辰拜江西瑞昌
知縣躬省田畝教其民始作織事深山中有流民千
餘家邏者往索賂不得與鬪不勝則妄言民反有司
議兵事甚急檄公先往公單騎至山口招之民喜曰

劉知縣至矣爭出自辨公返命曰無他請以身保兵
遂息九江屯兵多侵暴土著公嚴立條令執其尤者
一人杖殺之皆相戒不敢犯赤湖河泊所屢涉侵盜
民困徵納多竄歿公上疏請蠲其宿負若干而更始
之瑞昌舊額菽課歲數十萬而非其產每轉易他所
費數倍公請以所產粟薪代納民稱其便庚申歲大
旱公禱于神大雨浹邑畫境而止人甚異之辛酉述
職京師廷選爲浙江道監察御史未幾以母憂去廬
墓三年服闋調南京四川道奉勅治南畿盜地用大
寧已已詔大臣舉可領諸道邊務者公擢廣西按察

副使時嶺賊逢蠱起柳慶路絕有司無敢議行者公率
先藩閩撫順誅逆羣黨乃平景泰辛未守潯州都指
揮黃竑殺其異母兄思明知府岡及其家七百人以
減口公與叅政曾公翬往治之居月餘盡得其迹竑
乃使人持予金私二公于馬平驛舍且約事定後其
子當得府政則盡輸其府藏若干而父子各擁兵數
萬于外以相挾繞聲勢甚熾公陽許之乃留曾公于
潯爲約而去至南寧竑二子來迓公伏甲士縛之曾
公亦誘執竑于潯以歸論死竑窮蹙乃陰遣人上京
師造姦謀以徼恩澤果得釋罪且進位都督旣益橫

乃使人摭摭他事中公以報憾公亦上疏自陳事下有司未報公遽委政去天順初 今上既復儲位竝飲藥死其子政輩皆伏誅有勸公出者公不應成化戊子以子大夏恩授誥命進階中議大夫贊治尹丙申五月二十一日卒年八十有一公質直沈慤不事矯飾述職時楊文定公在內閣同王人皆往見贊奉甚厚文定弗悅公獨後往且用禮上甚見嘉獎爲御史文定嘗過其家徑造卧內見其服用簡朴歎曰真御史也公去瑞昌三十餘年大夏奉使迴潯陽有父老數十人拜而告曰某等皆尊公所部民也故來見君乃述公舊政數十事且問公齒貌居起狀皆南望戀戀感慕泣下云

維風篇

憲副劉公仁宅華容人忠宣公父也永樂庚子貢士初仕爲瑞昌令同邑人嚴某令高安同入覲文定遣一价往矚之价還白公曰嚴丈富貴雅稱官也劉丈藁薦布被瓦盆煤竈猶然窮人耳公心識之劉與嚴皆公隣邑人且有媿嚴賣劉特先見贊以幣公麾之劉嗣見具茗一袋蜜一缶耳公嘉納尋擢爲御史劉公爲御史時六七人共一馬更迭出入常與同僚約

過除歲各具一肉一蔬或具肉二豆酒一壺同僚甚
 訝其奢公出所有惟一枯魚而已後陞廣西憲副歸
 囊惟七金云正統庚申文定以展墓歸里劉公時為
 御史在京公還朝過華容便造馬問忠宣曰汝父在
 否曰在道中木回曰汝母安在曰適隣家磨麵去矣
 乃起徧視家中所有遂引忠宣討寢室見牀上惟蒲
 席布被褥喜曰所操若是可稱御史之職矣既去劉
 公回忠宣白其事劉公曰此必鄉先生楊少保也其
 為人縝密故觀人於所忽若此右忠宣為蕭僉憲聰
 言見夢醒錄蕭僉憲河南新野人文敏過華容忠宣
時尚亂

廣西按察司副使廖公紀墓志銘

蔣冕

嘉靖六年春巡撫兩廣都御史以田州餘寇猶未就
 擒檄廣西按察司副使廖公往處之公至南寧忽得
 疾醫診其脉謂身雖不病而脉實病甚恐疾至炎暑
 不可為公即星馳還司欲遂解組歸故鄉察家諸公
 見公飲食起居如平時謂必無他交留之未幾疾果
 增劇而卒公諱紀字惟修姓廖氏其先自臨江遷黃
 梅洪武中初設九江衛于湓城令近地民三戶出一
 兵隸戎籍廖氏與焉故今為九江人曾祖諱榮貴妣
 周氏祖諱暹妣馮氏考諱震從征兩廣蠻寇以功陞

百戶後以公貴封工部虞衡司郎中妣潘氏贈宜人
生七子其二公也自幼穎敏勤學問年十八入德化
縣學爲弟子員弘治十一年以詩經中江西鄉選十
八年登進士第試政數月適正德改元朝廷以浙之
安吉縣爲州難其守詮部謂公明敏嚴重首擢知州
事先是民之居鄉落者多恃其險遠凡有徵呼輒避
匿甚或旅拒弗靖有弄潢池之兵者公旣抵任鋤強
薙梗令出惟行於閭左善柔則又加意扶植由是不
逞之徒莫不俯首斂跡無敢復肆徵糧令下未旬浹
聞逋賦悉從上宮敢後者民旣革其故習士風亦

爲之不變科目數十年乏人至是遂有領薦賜第者
有識者皆曰此賢守造就之功也在任四年巡按御
史奏請旌擢及以禮獎勵者凡十有五尋陞南京兵
部職方司員外郎二年進禮部儀制司署郎中仍在
南京未幾丁潘宜人憂服闋改工部都水司郎中專
治濟寧以北河道數月調虞衡司歷兩京四司滿一
考以最受誥階奉直大夫仍封厥考及母妻贈封皆
如例又數月轉營繕司時方營建乾清坤寧二宮派
工費於天下府州縣者計數百萬權貴人與司其事
者肆意侵牟部從史及工作之長糾結爲奸科其爲

公家經費不過五之三四而已物議雖沸騰彼堀穴
詭秘莫可究詰公立法勾稽累年積弊蕩滌殆盡聲
譽由是勃勃以起而從旁側目者已不勝其憤矣銓
部恐公爲彼所中擢知延平府事四閱月以虞衡府
君憂解官歸俄值寧庶人之變賊據九江城內外居
民皆走避公獨守父柩不去後居喪走避者其父母
柩多爲賊所焚燬獨公之父柩巋然無恙人謂爲孝
感云服再闋改知平陽府未二年遂有憲副之擢在
廣西未滿一考中間述職往來餘一年復任未半年
遂有南寧之行以至不起距其生成化甲午

得年五十有四

廣西按察司副使楊公必進墓志銘

羅洪先

公名必進字抑之號南樓吉水澁塘里人也舉弘治
甲子鄉試正德辛未進士授行人選南京山東道監
察御史出爲廣西按察司僉事擢副使奉敕整飭府
江兵備去官二十七年卒于家實嘉靖壬子距生成
化丁酉享年七十有六大父永平通判韜父雖以公
貴贈監察御史母曾氏贈孺人公爲人倜儻不羈喜
任事自好爲兒時以穎拔爲大父母所慈授之書不
甚攻苦輒解悟師爲訓釋時出已意辨駁師莫能難

爲文不經意往往中肯綮及爲御史破削規繩能彈
壓人 武皇帝時關人怙虐莫敢嬰觸公疏劉喜畢
真竟抵于法屢疏建儲巡狩及發諸隱秘事宸濠難
作南都震恐公在江上急遣人以餞緮扼賊舟且授
防禦策沿江諸郡而提督江防都御史顏某聞變宵
遁公疏奪其官比論功安慶守備楊銳以公策上白
會 武皇崩不果議長江有點盜積歲捕治不得公
出計擒之至則語之曰若能爲我靖羣盜乎當貸若
命遂縱之如是至再盜復見擒謂邏卒曰吾何面目
復見揚公凡二十人皆扼吭死嶺南猺獞峒居險阻

多賄士吏爲耳目士吏旣不用命益蔓延不可制會
兩廣聚兵攻古田鳳凰寨三月不下公猝至其地閱
獄出囚之壯者二百人許其自効陰部勒之夜分篝火
自間入諸囚斧木仰登出寨後焚其巢諸司夜見
寨火爭踴躍相賀及明見諸囚出詢故始愧謝不及
蓋公未嘗與軍事也功上獲厚賞而都御史蕭紳因
以府江兵備薦自古田告捷諸猺轉相傳語畏公如
神公以爲府江菁密道遠不可驟以兵入馴虎兇要
必有誘之者首以恩信結其心始諸猺疑其言又冀
有以緩禍間出數十人嘗試公召之堂下言語歐歐

比遣歸遺之醪肉或饋巾其後稍稍率諸猺婦來見公既其夫人計令諸猺婦入見夫人又食以糝餌以少針線女紅分給之諸猺婦出其夫咸感激誓死不敢背德於是得其死力以爲鄉導岑猛之變畏公且至先納金三十有奇求解公密囊金公帑而佯諾其使意欲以此鈎猛而忌者疑有所泄遂被論去平生不滿於法度之士故是非者相半然善揣摩情實又能用柔令人曲就已意意有所欲雖冒寒暑風雨蒙謗訕當勞勩力爲之無所避也以故於兵事尤所自負當其往來田州見南平村迫於盜停車徒步相地勢令築連堡自衛分地刻期踰旬而成土人以公姓呼其處聞公過者無問民猺必走見去之日牽車奔號後十餘年有呼楊爺者簌簌然涕下也新建伯王公守仁尚書胡公士寧憐其才疏之朝竟格于例不得用歸家大治祠塚爲期會以聯同姓年甚高猶瞿瞿饋奠一日思自爲塚卜黃家凌巽巳山吉喜曰去吾廬不百步稱吾志也作壙數月而病病未亟能言某日時當死至期果然家請後事不一應

廣西憲副毅齋查先生墓志銘 澹園集

自文成先生倡學以來興起者衆若寧國貢受軒沈
古陵餘姚王龍谿錢緒山四公並高足弟子而親炙
四公以私淑文成者於涇上得一人焉曰毅齋查先
生余知學來所接賢士大夫多矣每見先生之友言
必稱我良朋先生之門人言必稱我師而論其爲粹
然有道君子也先生歿已久猶子友知謁余言文其
墓中之石余曷辭按狀先生諱鐸字子警別號毅齋
唐武德中諱文熙者任池宕二州刺史因家於涇先
生大父諱漢德父封文林郎德安推官諱景明母崔

氏張氏文林公生子五四出崔一出張公冢嗣也年十四崔孺人沒而張來繼先生事後母以孝著率諸弟肄文而更念匪學胡文匪聖胡學先後講於貢沈王錢四公間所涵濟最深己酉舉於鄉報至猶偕同志聚講抵暮而罷如弗聞也屢上春官不售南還卽台山與少傅穎陽許公方伯拙齋蕭公職方洪潭焦公相切劘而從遊若蕭都御史彥趙少宰士登蕭學使雍趙憲副善政王國子廷楠鄭明經岱探討上下彬彬然盛已乙丑成進士授德安府推官公清介絕俗而不欲爲煩苛其於單赤尤曲體其隱諸生葉潤

爲讐所中先生爲直之至以忤直指不顧聞令有欲那移乾沒自潤者先生微感之令其省改不以摘發之名自居也其鞫獄民就理恐後情法不蔽者爲平亭之諸開釋者自慶幸恨得公晚久之治理流聞薦剡且上一同官直指欲並舉而疑其年先生曰第論能職不耳如以年則某長於彼且二歲直指絕歎以爲難愈重先生未滿考以卓異徵道經新鄭先生故新鄭相乙丑所舉也時家居見先生思致書都門爲公道地先生堅卻之以此忤其意入京拜刑科給事中轉戶科右仍轉刑科左屢疏勸經筵覆邊功定營

議舉人才言不爲矯激而識者服其得體休暇輒從
海內名碩結社論學以爲常未幾新鄭因緣中涓起
且兼銓部勢張甚欲有所修舊隙一日問先生以直
報怨意何居先生若弗喻其指答問一以恬夷劑之
令其自解又欲出一罪人與進其私黨先生兩執不
從因與之左乃抑先生補山西叅議適當表賀先生
疾不行撫臣迎新鄭肯論致仕父老留之車爲枳先
生油然而不以屑意也新鄭罷臺省交章薦復補先生
舊任父老爭歡迎之至則革蒲東停喪敝習定爲羣
儀勒令互察得歸土者不可勝數有妖似獮能匿形
而人言多煽惑先生出示驅之妖謝相知者曰
正人吾不敢犯爲避去兩閱歲晉廣西兵備副使抵
家而奉文林公諱喪葬一行古禮公除仍以舊職領
廣西驛傳之任三日卽以入賀行還任三月移疾歸
中丞郭公六下劄留之不可遂翩然東返爲復水西
書院倡明理學卽單戟後進折節引之未嘗不與講
敵禮也平居不至郡邑至均田救荒則力言於當事
爲鄉人無窮計臺使者時屢疏以薦而先生已決終
焉意矣先生豐下廣頰髯歷歷可數音吐若鐘生平
品格如麟鳳心事如天日言行有壇宇坊表其於世

人窺瞰依附非特所不屑抑亦所不知乃其學則篤信文成先生致良知簡易直截爲三字符時講者各立門戶先生獨守之不易謂良知不執於見卽口虛不染於欲卽曰寂不累於物卽曰樂無有無無始終無階級俛焉日有孳孳終其身而已居恒闇然自修恥不爲表暴然學者讀其書知其學之深考其行而不合於書者蓋寡也最後疾作族兄秀視先生問曰得無動乎先生曰能病吾身耳吾心何病旦而起索衣冠端坐逾時遂暝嗚呼此所謂任重道遠死而後已者平時萬曆己丑十月三十日距所生正德丙子

正月十七日享年七十有四配太平謝氏封孺人生子三琪清琅清玕清並國子生玕清先生卒今由子孫及曾玄雲仍輩出能世其學固知先生之所延者長也余嚮往先生有年茲敘而銘之竊比於神交尙友之誼銘曰 士貴何必極隨事而自力毋忝厥職士言何必華以學興於鄉足名其家蛻委於茲丘子孫食其休惟千萬秋

廣西趙憲副伊傳

戚元佐

趙公伊字子衡參政公第四子也少有文名弱冠舉
進士居官二十餘年家食居其半其始授刑部主事
也以謝病歸病起乞南改南京兵部職方司主事歷
員外郎郎中以母喪歸已補武選則又以不得于上
官歸最後任車駕出爲憲副則浩然以致其政歸大
抵公恬曠無慾視官如贅旆故旋出旋入不自顧惜
然居常以忠孝自勵視國如家自始仕至懸車一日
也始仕時在職方人視之一美少年耳人呼之爲小
趙及其蒞政事事有體不肅而整胥史空手坐曹中

不得竄刀筆其兵馬官犯罪公立逐之更不關白要
路人病其專不計也巡江指揮縛一江洋大盜至且
具言夜所以格鬪身被巨創幸見擒獲狀公慰勞甚
苦執盜訊之云若固盜耶盜不勝冤吐其實乃良民
駕木筏而賈者於是悉召所居什伍相保者鞠之語
盡合蓋夜抗官兵真盜逸去矣此良民非盜繫之何
罪遂釋其縛而遣之既遣人情疑信未定盡驚怪大
訖上官亦聘貽相謂久之事始白乃知職方之明決
也在武選有要路故人夜持兩甕來饋發馬金也詰
之得自某冀有所請輒斥使去門下而故人忸怩歸

矣中山王後徐錦衣以傳奉得官法不得襲乃內附
貴璫外托相嵩子世蕃主之曲爲得上旨公力諍不
可欲廷辯上官不能聽乃拂衣還久之起車駕轄置
郵關符事立禁甚嚴自宰執大臣至要路諸臣無弗
痛嫉之遂擢廣西按察副使既就官以父春秋高日
夜念不置乞歸侍其父歸侍二年父卒傳曰五十而
慕公之謂也公初刻意詩文入南都遇湛文簡鄒文
莊羅文恭王汝中諸公聞性命之說則心驟喜謂聖
人可立至遂欲以躬踐之當是時汝中在諸公間最
善闡師說公亦心敬汝中事之幾于師獨其三教合

一之說公終不謂然蓋不欲效世俗講學者以空寂
爲宗也歸後十數年穆宗皇帝御極起用先朝舊
臣薦公者章疏上太宰陳以請而公列起籍竟逡巡
數年而不以入除目乃至虛詔旨以老且死公又嘗
曰吾平生夢最多則未嘗夢受人物此立心之隱人
所未嘗又恥標榜立名與人言重然諾居常有所作
爲苟所執者是則百折不撓人欲以私劫之則氣愈
勵雖禍患相迫必伸已志而後已使在聖門將必見
許剛者不至對申張而嘆矣 卒年六十二

廣西按察司副使鄭公一信墓志銘

陸可教

可教爲諸生時其郡守曰惠安鄭公公爲政精敏待
裁自諸曹掾史以下咸重足斂跡不敢以身試法先
是二千石有所逮捕行檄卒手片楮謹嗽下邑勢如
餓鶻公凡皆屏息立仗下至不能名一錢郡故囂訟
影响株連乃至故爲誕蔓不可解公一切嚴爲禁絕
訟以衰息自餘諸劇盜大豪前後守令度力不能擒
制無所誰何公一一麗之法不少縱於是八邑廩廩
稱神明矣乃公故敦尚文教自呂成公而下諸大儒

名公祠宇往往捐俸入葺治之以示人士所風尚間
進郡諸生相與揚挖經義口授大旨以此教受知於
公最深且稔其行事退而私論公以爲漢張敞尹翁
歸其人也乃公竟以執法不阿見中讒口調守石阡
去又五年而始遷貳蜀憲又二年而移治粵西皆相
見於京師亾何復中讒口歸矣蓋公治蜀如治婺身
董七道案無伏姦凡方田清伍若茶馬諸大役百蠹
所蝟集皆搜洗剗察無所捐漏有墨吏度且扞囹實
金於茗以嘗公公立發金劾案之諸所廉屬咸望風
咋指退矣其治粵西如治蜀會當道以所俘馘叛苗

下所司核實意欲少文致以爲功次公一以實上無
所阿蓋執法多忤復如婺其見中亦卒以此然公治
亦不一切附於巖石阡夜郎僻郡夷俗狃獷人謂非
法格之不可公至則爲罷減繇役招致叛夷所在成
村居教之樹藝蓄積摩撫以兒子不鄙夷諸生而婺
人士督誨之至爲手訂其句讀蓋公去而郡士舉於
鄉者踵接矣以彼觀之卽文翁何讓焉詎云張尹哉
公爲人自信斬斬方報罷粵西時婺士有習於大璫
者欲爲之地公立謝絕之旣罷里居杜門斷請謝自
娛以文史性嗜義好施有鄉人某者坐巫蠱論死密

爲解之不令知初邑中島夷四郊骨暴如莽公大出金穀募人瘞埋之其遺行可徵於狀者如此教雖受知於公最深終不敢稍有增飾徒作諛墓語而務詳其耳目所槩見亦欲後人想像而得其丰神之百一也公諱一信字君允別號石巖其先世出光州之固始自唐末徙閩家惠安遂爲邑著姓王高祖曰弼養高祖曰明魁曾祖曰元郎祖曰珍珍以尙書起家爲廣東三水教諭季子荆山能世其家學公父也娶郭氏皆以公貴累贈中憲大夫石阡府知府郭贈恭人公生而穎敏精工博士家言燁然有聲黌校間以嘉靖乙卯舉於鄉第二人以乙丑舉進士官南京行入司左司副歷刑部員外郎郎中金華石阡知府四川廣西副使其宦績之槩具如前卒於萬曆庚辰距生嘉靖戊子得年六十有三

廣西按察僉事鄭先生觀墓碑

王俱

先生姓鄭氏諱觀字允巽初字尚賓常州武進人祖諱通甫考諱銘以公貴贈文林郎江西道監察御史妣戴氏贈孺人三子先生其季也天賦敏穎人知其不凡旣而考妣相繼歿伯兄允孚長育之延師教之弱以兄命居蕭田別業治隰田數百畝躬率僮僕播種斂穫區別疆里井然有緒雖甚勤苦而學無怠廢時郡著姓嚴斯道死有遺孤女其妻孫氏守節求得壻能終養者聞先生賢遂請諸其兄而館焉先生日具甘旨事孫如母暇則親賢取友以相切劘信國湯

公之孫仲光延居家塾訓迪其子遠近聞而至者先後數百人至席不能容先生皆隨其才質造就之永樂辛丑縣簿鄭溱將薦于朝懇辭弗就洪熙改元朝廷遣進士齋勅訪文儒于常蘇松三郡郡守熊候觀以先生應詔同舉十一人試天曹以先生爲首會仁廟上賓不果用大傳安遠侯柳公昇遂請于朝以爲子師柳公歿子溥嗣先生上疏辭歸特旨授訓導仍館其家蓋列侯之第有訓導者自先生始無何禮部尚書胡公薦陞廣東道御史轉江西道自冷局陞顯官如先生者亦前此不多見也先生於是盡舉平

日所存以措諸行事凡分所當爲爲之一無顧忌初巡天財庫繼巡畿甸兩奉璽書整飭西北諸關隘所至威惠並施士卒趨赴恐後事有未便悉更張之還奏稱旨正統庚申巡南北運河兼檢關津所輸舟船稅鈔以均給於遠歲鹽商人人稱平壬戌出巡山東首劾藩司之正佐各一人臬司都司長吏之蠹政者二三人罷黜之郡邑庶僚以貪墨者去又未兩指數武弁干紀至以勢撓先生切責之不少貸疑穢積歲未決者悉爲剖斷蓋一循乎公法而無恤利害魯賢王聞之每宴必舉觴相屬且親書中復堂字以賜乙

丑用太常卿蔣公薦陞廣西按察司僉事分巡蒼梧諸郡其行事無異齊魯獠獠兩奉命參贊副總兵田公勦平之朝廷亦兩遣使齎金豸龍衣寶鏹爲賜時柳侯方開府廣右見先生執弟子禮每事必請先生亦隨問而答咸有規益至於饋送之禮則深拒弗納景泰庚午入朝遂乞休致時年六十有一天順甲申援詔例進階朝列大夫蓋在仕途者二十年比歸林下又二十年卒春秋八十有二爲人稟性方直識量恢宏自處困以至貴顯始終一致華美之服珍玩之器皆所不好也旣謝事卽別創一室貯粟百斛名存餘倉將以供祀謂常存其餘久之遂以周貧每歲訖無餘輒復繼焉有假貸不責其償人有患難拯援之不待其請親友過從款洽無厭睦宗和族恩義逾篤然於教子孫則一以嚴毅子三人垂白侍側不假辭色遇諸卑幼隨事箴戒肅然栗然無不拱服見之者率能銷沮其奢豪蕩佚之心而卽之者熏炙其溫厚和平之氣嗚呼老成邈矣典刑猶存晚生後進豈不獨有聞風而興起者乎

廣西按察司僉事熊君景墓志銘

羅玘

閒住翁廣西按察司僉事熊君也諱景字開甫幼爲熊氏令子弟比長以詩領江西已卯鄉薦成化己丑登進士入刑部爲主事擢員外郎己亥轉今官甲辰念母劉太安人老無侍請歸養因以是號志休退也丁未年五十六十月晦日卒越八年是爲弘治八年其孤葵始克與其季葛謀以十月十六日葬君前事屬鴻臚序班裘儀來丐銘儀君壻也道君之世與其事甚覈其爲主事也屬部多大獄部長使鞫則屢掣于大閹貴人橫豎間隔法所入必脅使出所出必入

君意一不爲動出入惟法無爽錙銖至爲員外郎亦然時名大起人逆君遂大用以員外郎贈其父母封太安人妻封安人部長德君助已常與太宰道君能更實不欲它用太宰誤以爲薦也以當廣西部長大悔君欣然行凡所轄道則犴狴一空投牒受辯旁午立門外入則惟聞脫校聲吏俯首書牘不敢睨人張關節要賂爲姦二廣節鎮都臺朱公嚴於覈實以賢監司許君檄君勾當潯桂諸徭徭人類面獸性居山林遇擾動輒號跳呌嘯舐觸跳踉必以死逞靜則跽伏不見踪跡君知其然約吾兵不得徙壁壘陰遣間衣商人服負鹽底徭所若爲潛竄懋易者徭不疑也集來詞虛實問曰吾商人不知新按察官何人然見其方具器若古壺狀者十數實石其中室以巨木計曰徭出降無庸發此不然此嘗破大藤峽者也徭懼白酋酋卽日降不旬日降徭及獐獠數十姓蓋君以謀勝也公大喜鑄銀牌曰獎勞功勤以付君亦以勸來者及其請歸也父老泣留謀沮之然以不及先事爲悔明年乙巳朝廷追憶其勲以文綺卽其家賜之居毋太安人側恂恂如童七筮不以人代人問居官時事笑曰國有成憲官率循之無工拙也退然不以

自多而實非忘世者太安人歿喪以禮凡緇黃營于冥者屏不用嘆曰吾何能俾吾父母貴吾何敢必得養吾母以畢吾私皆吾君賜也吾雖駑然誓此身邁往一奮報者至是已矣熊之先君南昌杉塘世傳楚子熊繹之裔屹然大宗元社將尾盜四起能以兵保障其鄉曰九成人無少長咸曰善翁是爲君之高祖九成生德讓德讓生素敬素敬生資直資直君父也文皇帝時德讓以才子選在江西十八人之一竟齟齬終泉州司稅壻諶氏諶板湖豪也遂居板湖於君爲曾祖素敬懲不仕能以所儲二千石貸饑人償未竟忽取其券一火炳之復來償者曰而未嘗貸吾粟何償也弗納號留耕於君爲祖資直則儒者也學有源委教於鄉爲嚴師於家亦以嚴勝太安人助之故君無假它師而成歿贈生封實宜配傅氏封安人者也子葵葛丐銘者是已女鳴貞儀之妻淑貞妻張訖順貞妻齋世華懿貞妻林紡葛暨世華紡皆業進士爲學生孫男龍孫女閨懿尙幼也

廣雅

卷之三十一

三十一



